

U skladu sa mojim ovlaštenjima prema Aneksu 10. Općeg okvirnog mirovnog sporazuma za Bosnu i Hercegovinu i članu XI Borskog dokumenta, odlučujem da Zakon o administrativnim taksama u Bosni i Hercegovini stupi na snagu 31. jula 1999. na privremenim osnovama, u formi usvojenoj od strane Vijeća ministara 31. augusta 1998. i u skladu sa naknadnim amandmanima predloženim od Parlamentarne skupštine, dok Parlamentarna skupština Bosne i Hercegovine ne usvoji ovaj zakon u odgovarajućoj formi.
30. jula 1999. godine

Sarajevo

Visoki predstavnik

Carlos Westendorp, s. r.

ZAKON

O ADMINISTRATIVNIM TAKSAMA

Član 1.

Ovim zakonom uređuju se administrativne takse koje se plaćaju u postupcima pred institucijama Bosne i Hercegovine i radnjama koje preduzimaju ove institucije.

Član 2.

Administrativne takse plaćaju se za spise i radnje u upravnim stvarima kao i za druge predmete i radnje kod institucija Bosne i Hercegovine.

Član 3.

Spisi i radnje za koje se plaća taksa kao i visina takse utvrđuje se Taksenom tarifom.

Tarifa administrativnih taksa propisuje se ovim zakonom.

Član 4.

Takseni obveznik je lice po čijem je zahtjevu pokrenut postupak ili se vrše radnje predviđene Taksenom tarifom.

Ako za istu taksu postoje dva ili više obveznika njihova obaveza je solidarna.

Član 5.

Ako Taksenom tarifom nije drugačije propisano, taksena obaveza nastaje:

1. za podneske - u trenutku kada se predaje, a podneske date u zapisnik- kada se zapisnik sastavlja;
2. za rješenje i druge isprave - u trenutku podnošenja zahtjeva za njihovo izdavanje;
3. za pravne radnje - u trenutku podnošenja zahtjeva za izvršenje tih radnji.

Član 6.

Taksa se plaća u trenutku nastanka obaveze, ako ovim zakonom nije drugačije određeno.

Član 7.

Ako je Taksenom tarifom propisano da se taksa plaća prema vrijednosti predmeta, kao osnovica za obračunavanje takse, uzima se vrijednost označena u podnesku ili ispravi ili vrijednost utvrđena procjenom organa koji vodi postupak kad postoji opravdan razlog za sumnju da vrijednost označena u podnesku ili ispravi ne odgovara stvarnoj vrijednosti.

Član 8.

Kada se isprava za koju se plaća taksa po zahtjevu stranke izdaje u dva ili više primjeraka, za drugi i svaki daljnji primjerak plaća se taksa kao za prepis i ovjeru prepisa.

Taksa iz stava 1. ovog člana ne može biti veća od takse za prvi primjerak.

Član 9.

U rješenju ili drugoj ispravi za koju je taksa plaćena mora se označiti da je taksa plaćena u kojem iznosu i po kojem tarifnom broju.

Član 10.

Netaksirani ili nedovoljno taksirani podnesci i drugi spisi, izuzev oslobođenih od plaćanja takse ne smiju biti primljeni direktno od stranke.

Ako netaksirani ili nedovoljno taksirani podnesak stigne poštom organ nadležan za odlučivanje po zahtjevu, pozvat će taksenog obveznika opomenom da u roku od osam dana od dana prijema opomene plati redovnu taksu i taksu za opomenu.

Nadležni organ pokrenut će postupak i po netaksiranom ili nedovoljno taksiranom podnesku iz stava 2. ovog člana, ali rješenje ili drugi akt ne može biti uručen stranci prije nego što plati taksu po opomeni.

Član 11.

Odredbe člana 10. stav 2. ovog zakona ne primjenjuju se na podneske i druge spise koji netaksirani ili nedovoljno taksirani stignu poštom iz inozemstva, niti na ostale spise i radnje koje podliježu konzularnim taksama. S tim podnescima i spisima postupit će se na način propisan članom 24. ovoga zakona.

Član 12.

Spisi i radnje u postupcima koji se vode po službenoj dužnosti ne podliježu taksi.

Član 13.

Od plaćanja takse oslobođeni su:

1. institucije Bosne i Hercegovine;
2. humanitarne i dobrotvorne organizacije registrirane u Bosni i Hercegovini ;
3. strana diplomatska i konzularna predstavništva u diplomatskim i konzularnim poslovima pod uvjetima reciprociteta;
4. građani za akt o zasnivanju radnog odnosa u institucijama iz člana 2. ovog zakona.

Član 14.

Oslobođeni su od takse sljedeći spisi i radnje:

1. u postupku za povraćaj nepravilno naplaćenih taksa;
2. u postupku za ispravku grešaka u rješenjima, drugim ispravama i službenim popisima (evidencijama).

Član 15.

U ispravama koje su oslobođene od plaćanja taksa mora se označiti u kom se cilju izdaju i na osnovu kog propisa su oslobođeni od takse.

Član 16.

Strani državljani pod uvjetima reciprociteta, imaju ista prava po propisima o taksama kao i državljani Bosne i Hercegovine.

Član 17.

Kod institucija iz člana 2. ovog zakona, na teritoriji Bosne i Hercegovine, takse se plaćaju u gotovom novcu.

Član 18.

Prisilna naplata takse vrši se po propisima entiteta o prisilnoj naplati poreza građana, odnosno po istim propisima o prisilnoj naplati poreza od pravnih lica.

Član 19.

Lice koje je platilo taksu u gotovom novcu koju nije bilo dužno platiti ima pravo na povrat novca u visini naplaćene takse.

Postupak za povrat takse pokreće se po zahtjevu stranke.

Rješenje o povratu takse donosi organ kome je taksa plaćena.

Povrat takse vrši se na teret prihoda budžeta Bosne i Hercegovine čijoj je instituciji taksa plaćena.

Član 20.

Pravo na naplatu takse zastarijeva u roku od dvije godine računajući od dana kada je taksu trebalo platiti, a pravo na povrat takse zastarijeva za dvije godine od kada je taksa plaćena.

Član 21.

Kontrolu primjene propisa o administrativnim taksama vrši Ministarstvo civilnih poslova i komunikacija.

Unutrašnju kontrolu primjene propisa o administrativnim taksama vrši svaka institucija u vršenju svoje djelatnosti.

Član 22.

Taksu u gotovom novcu, bez obzira na iznos takse plaćaju i takseni obveznici sa sjedištem, odnosno prebivalištem u Bosni i Hercegovini kada se iz Bosne i Hercegovine obraćaju diplomatskim i konzularnim predstavništvima Bosne i Hercegovine u inozemstvu.

Taksa iz stava 1. ovog člana plaća se u konvertibilnim markama na uplatni račun prihoda od konzularnih taksa.

Takseni obveznici koji iz inozemstva traže da im organi u Bosni i Hercegovini izvrše radnju podložnu plaćanju takse, plaćaju taksu u stranoj valuti po važećem tečaju.

Član 23.

Ako taksa koja se plaća kod diplomatskih i konzularnih predstavništava u Bosni i Hercegovini, u inozemstvu nije plaćena unaprijed u smislu člana 5. ovoga zakona, naplata će se izvršiti prije uručenja rješenja ili druge isprave taksenom obavezniku.

Član 24.

U postupku kod diplomatskih i konzularnih predstavništava Bosne i Hercegovine u inozemstvu oslobađaju se od plaćanja takse:

1. institucije u Bosni i Hercegovini;
2. spisi i radnje koji su po odredbama ovog zakona oslobođeni od taksa u Bosni i Hercegovini;
3. spisi i radnje čije je oslobađanje od taksa predviđeno međunarodnim ugovorima.

Član 25.

U postupku kod diplomatskih i konzularnih predstavništava Bosne i Hercegovine u inozemstvu državljani Bosne i Hercegovine koji imaju status izbjeglice u trećim zemljama plaćaju 50 % od propisane konzularne takse za putne isprave.

Član 26.

Pored konzularne takse, takseni obveznik tražilac usluge dužan je platiti i stvarne troškove prouzrokovane zahtjevom.

Član 27.

Rješenje o povratu konzularnih taksa donosi šef diplomatskog, odnosno konzularnog predstavništava Bosne i Hercegovine u inozemstvu i izvršava ga na teret tekućih prihoda od tih taksa.

Član 28.

Nadzor nad primjenom odredaba ovoga zakona i Tarife administrativnih taksa kod diplomatskih i konzularnih predstavništava Bosne i Hercegovine u inozemstvu, vrši Ministarstvo civilnih poslova i komunikacija u saradnji sa Ministarstvom vanjskih poslova.

Član 29.

Ovlašćuje se ministar vanjskih poslova da u saradnji sa ministrom civilnih poslova i komunikacija može odrediti da diplomatska i konzularna predstavništava Bosne i Hercegovine u inozemstvu naplaćuju konzularne takse od državljana pojedinih zemalja u istom iznosu u kojem te države i njihova predstavništva naplaćuju te takse od državljana Bosne i Hercegovine.

Član 30.

Administrativne takse utvrđene u Tarifi u odjeljku za rad institucija iz člana 2. ovog zakona, plaćaju se u konvertibilnim markama u budžet Bosne i Hercegovine u skladu sa naredbom o uplatnim računima budžeta Bosne i Hercegovine, osim za diplomatsko-konzularna predstavništava Bosne i Hercegovine na koja se primjenjuje stav 2. ovog člana.

Administrativne takse utvrđene u Tarifi u odjeljku Takse za rad diplomatskih i konzularnih predstavništava Bosne i Hercegovine plaćaju se na devizni račun diplomatskog i konzularnog predstavništava koja ova sredstva prenose na račun budžeta Bosne i Hercegovine u skladu sa naredbom o uplatnim računima budžeta Bosne i Hercegovine.

Član 31.

Sastavni dio ovoga zakona je Tarifa administrativnih taksa.

Član 32.

Ovaj zakon stupa na snagu osmoga dana od dana objave u "Službenom glasniku BiH" i objavit će se u službenim glasilima entiteta.